
OFFERYNNAU STATUDOL CYMRU

2005 No. 666

**Rheoliadau Cynhyrchion sy'n Dod o Anifeiliaid
(Mewnforion Trydydd Gwledydd) (Cymru) 2005**

RHAN 12

Tramgwyddau a Chosbau

Rhwystro

60.—(1) Ni chaiff unrhyw berson—

- (a) rhwystro unrhyw berson yn fwriadol wrth iddo arfer pŵer a roddwyd gan reoliad 8 neu 9 neu wrth iddo gyflawni unrhyw swyddogaeth reoliadol arall;
- (b) methu cydymffurfio heb esgus rhesymol â gofyniad a osodwyd arno yn unol â rheoliad 8 neu 9, neu fethu rhoi i unrhyw berson sy'n arfer pŵer a roddwyd gan y rheoliadau hynny, neu sy'n cyflawni unrhyw swyddogaeth reoliadol arall, unrhyw gymorth neu wybodaeth y gall fod ar y person hwnnw angen rhesymol amdano neu amdani er mwyn arfer y pŵer neu gyflawni'r swyddogaeth; neu
- (c) rhoi i unrhyw berson sy'n arfer pŵer a roddwyd gan reoliad 8 neu 9 neu sy'n cyflawni unrhyw swyddogaeth reoliadol arall unrhyw wybodaeth y mae'n gwybod ei bod yn ffug neu'n gamarweiniol.

(2) Rhaid i baragraff (1)(b) beidio â'i gwneud yn ofynnol i berson ateb unrhyw gwestiwn neu roi unrhyw wybodaeth os byddai gwneud hynny yn gallu taflu bai arno.